



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 10


Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7



ATK Mohun Bagan-i coach Habas
mapa nungi anentsü

J&K temeden atema lanurtemi
ola adoktsüla: Mehbooba Mufti



VOL. XIX NO. 72 (ADOK 72)

DIMAPUR

AMUNGNÜ

(SUNDAY)

LUCHII

(DECEMBER) 19, 2021

₹ 5.00

JDU-i NE nungi AFSPA agientsü akhanger



JDU party MLA Techi Kaso aser President Ruhi Tagung nati anir Oting lendong nung asürtem nem tetushi agüja Rally aser Candle Light Vigil sentong agidang tangokba noksa nung angur.

Dimapur, December 18, 2021

(TYO): Northeast nung Armed Forces Special Powers Act (AFSPA) ajanga tai maketba nisung meyrjang aika taküm samaogo. Anungji India sorkari Northeast nung AFSPA alizüing tonga inyak asü masü'ar telangzüba agütsüsüla ta Janata Dal (United)-i metetdaksü.

AFSPA kübok tang testüsuba atalokbaji Oting nung Indian Armed Forces-i nisungtem tepsetba liasi.

Nagaland aser Meghalaya Chief Minister temi yimjak nung AFSPA agientsü takhangba agütsüogo. North East nungi kaketsir aser civil society telok balalai mapang shia AFSPA agienang ta takhangba agüja aruba nung Chief Minister anati ola adokba ajanga tali ulushiogo, ta JDU-i ashi.

Mon district kübok Oting yim nung AFSPA ajanga nisung taküm laluba atema jashir saka kasa mapang nung iba tatalokba ajanga

North east nung telok ajaki tarutsü nung Oting lendong amala majurutsü atema AFSPA agientsü asoshi ola adoktsüla, ta parnokisa metetdaksü.

Nagaland aser Meghalaya Chief Minister anaprongi North East nung party ajak adenba telok ka tenteter Delhi nung oa Prime Minister aser Home Minister na den ajurutepa AFSPA agientsü atema tenangzüba agidaksütsü ayongzüker, ta JDU-isa metetdaksü.

December 16, 2021 nü JDU Arunachal Pradesh nung party MLA Techi Kaso aser President Ruhi Tagung nati anir Oting lendong nung asürtem nem tetushi agüja Rally aser Candle Light Vigil ka ayonga agiogo. Iba sentong nungsa AFSPA agientsü atema takhangba agütsü, ta Chairman, NEEC, Senchumo NSN Lotha-i sangdong ka nung ashi.

COVID-19 Nagaland: 4 dak putet & 3 taneptsü angur

Kohima, December 18, 2021 (TYO): Nagaland nung Honibarnü nisung 4 dak COVID-19 putet aser 3 taneptsü angur.

"Tanü Mokokchung nung nisung 2 aser Dimapur o Kohima nung nisung kaka dak COVID-19 aliba putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

Tanü Dimapur nung COVID-19 puteta alir nisung 3 taneptsü angur aser parnok züingsema taneptsü angur ajak agi 30,315 kümogo. Ibaji taneptsü angur 94.24% lir, ta paisa ashi.

Tang nisung 84 anepaludar saka parnok 66 dakbo shirangba yimya

kecha mali ta paisa shisem.

"Hokolbar tashi nung nisung 756,904 nem COVID-19 vaccine indang dose 13,27,610 agütsüogo" ta State Immunization Officer Dr Ritu Thurr-ia ashi.

"Vaccine agirtemji frontline workers 60,983, healthcare workers 16,004, arishi küm 45 ser tempur 213,508 aser arishi küm 18 nungi 44 tsüingda alir 466,409 lir" ta paisa ashi.

"Vaccine agirtem rongnungi nisung 570,706-i dose anaprongi agiogo. Parnokji frontline workers 48,601, healthcare workers 13,540, arishi küm 45 ser tempur 177,819 aser arishi küm 18 nungi 44 tsüingda alir 330,746 lir" ta Dr Thurr-isa ashi.

NHIDCL-i Nagaland Police nem teyari agütsü

Dimapur, December 18, 2021 (TYO): December 17, 2021 nü National Highway and Infrastructure Development Corporation Ltd, (NHIDCL)-i Police Department nem mozü aser medical equipment agütsüogo.

PHQ Conference Hall nung sentong ka agidang NHIDCL-i M/S PKIPL-NSC (JV) & SIMPLEX Infrastructures LTD ajanga teyariji agütsü.

"Nagaland Police aser NHIDCL ya telok khenyongi balala lir aser wadang balala inyaker saka tangatetba ka agi longjemer aser ibaji Public Service lir. Iba ajanga tanü Police aser NHIDCL longjemdaksüogo" ta DGP Nagaland, T. John Longkumer-i o jembidang ashi.

NHIDCL-i teyari agütsüba atema

kanga pelar aser nungdak mapang nung Nagaland Police-i yaritsü nangzüker, ta DGP, Nagaland-isa ashi.

Taoba mapang NHIDCL-isa police department nem ambulance 6 agütsüogo.

NHIDCL-i yashi agütsüba nung tablets, injections, supplements and medical devices such as Portable ECG Machine, Syringe Infusion Pump, Digital BP machine, Glucometer, Phototherapy unit with trolley etc dena lir.

Iba sentong nung mendenji Temjensenla, NPS, AIGP (Prov) liasü aser ADG (Adm), ADG (Law & Order), M.S Deol, Executive Director, NHIDCL, PHQ nungi ketdangstürtem aser NHIDCL, M/S PKIPL-NSC (JV) and SIMPLEX Infrastructures LTD nung teshimtet nübotem aden.

Nagaland nung district tasen 3- Tseminyu, Niuland & Chumukedima kümtetogo

Kohima, December 18, 2021 (TYO): Nagaland sorkari Honibarnü district tasen asem kümtetogo aser parnok züingsema district ajak agi 15 kümogo.

"Honibarnü State cabinet senden nung district tasen asem - Tseminyu, Niuland aser Chumukedima kümtetgo telemtetba agi" ta Deputy Chief Minister Yanthungo Patton-i ashi.

Nagaland nung district 13 buba asütsü atema Kohima district kübok Tseminyu Subdivision, 14 buba asütsü atema Dimapur kübok Niuland Sub-division aser 15 buba asütsü atema Dimapur kübok Chumukedima Sub-division telemtetba agiogo.

Nagaland nung kin 11-i district tasentem kümtetgo takhangbatem liasü saka Cabinet-i district tasen asem dang kümtetgo lemtet. District kar nungbo kin ka dang lir aser itemji lemsatsü makok, ta Y Patton-i ashi.

Dimapur district nung Ghaspani-I Assembly constituency nungi district tasen ana kechiba kümtetba ta osangbeneri asüingdangdang "Iba ya constituency nung ajemdaker masü saka Chumukedima ya urban rural district ta kümtetogo aser Niuland ya arrtsülen lir, iba jagi district balaka akümtsü nüngdaka liasü" ta Y Patton-i langzü.

"Tuensang district kübok Shamator nem district agütsütsü atema Cabinet-i molungogo saka Yimkhiung, Tikhir aser Sema nung tsüingda atema arrtsü shitak melatet tashi aser ken o

tem mangatettep tashi onoki Shamator nem district balaka magütsütsütsü" ta paisa metetdaksü.

Sorkari tekaratiba nung district tasen kümtetba sentong agütsü, ta paisa shisem.

"December 18, 2021 ya otsüsütsü anogo ka lir. Tseminyu Nagaland nung district 13 buba kümogo. Rengma Naga nung tenüing nung ni CM Neiphiu Rio aser Cabinet züingsemtem dang pelaba metetdaksür" ta Animal Husbandry and Veterinary Services and Women Resources Development Advisor aser Tseminyu constituency MLA, R Khing-i ashi.

"Tanü state cabinet-i kü constituency kübok Niuland aser Chumukedima district tasentem kümtetgo. CM Neiphiu Rio dang kanga pelar. Iba ya Christmas sempet tajungtiba lir" ta Public Health Engineering Minister aser Ghaspani-I Constituency MLA, N Jacob Zhimomi-ia metetdaksü.

Nagaland nung district 12 buba Noklak kümtetba sülen küm ka majungdang ano district tasen asem kümtetgo.

"Iba ya Rengma nung atema Christmas sempet tajungtiba lir" ta Advisor Khing-i ashi.

"Tseminyu district kümtetba ajanga sorkari 'o masü mapa' ta asüba omen nung inyakba atalokogo. Rio'er sorkari otsüsütsü telemtetba agiba atema Rengma nung kanga pelar. Maneni, sorkari district 13 buba Tseminyu renloksü atema temolung agütsütsü inlar" ta paisa

metetdaksü.

"Tseminyu district kümtetba sentongji benjung temer agütsü" ta Advisor Khing-isa ashi.

"Rengma nung atema taginüba tulutibaji Tseminyu district akümtsüba liasü aser Rio'er sorkari iba ya asangsang nung ataloktsüba atema kanga pelar" ta Rengma Hoho president Pollem Tep-ia ashi.

"Onoki 2003 nungi pa sülen anidaker kechiyong pai Rengma nung taginüba tongtsütsü ta onoki tamang aka. Pai tesüiba küm ana-asem tashi onok dang nangzüka aru aser onokia imlaa aru. Tanü pai nangzüka ama inyaksüogo aser iba jagi tang aliba ministry dang kanga pelar" ta Pollem Tep-isa metetdaksü.

"Onoki Rengma nung atema district balaka kümtetgo takhangba agütsüba sülen nungi sorkari ibaji ataloktsütsü ta teimla liasü aser tanü ibaji tongtetogo. Onok den kidanger kintem talisa Tenyimia nung dang kanga pelar. Onokisa tanü sorkar nung council of ministers dang iba telemtetba agiba atema pelaba metetdaksür" ta Naga Students' Federation (NSF) president Kegwayhun Tep-ia ashi.

"Tanü ya Rengma nung atema 'red letter day' ka lir" ta Rengma Selo Zi (youth) president Kenneth Kath-ia ashi.

"Rengma nung iba osang ya angashinüa liasü aser sorkar aika arur ogo saka tanü United Democratic Alliance sorkari kanga dang tasütait telemtetba agia Tseminyu district kümtetgo" ta Kenneth Kath-i metetdaksü.

Arunachal CM-i lisopur maitsü mesamatsü ayongzüker

Itanagar, December 18, 2021 (Agencies): Arunachal Pradesh nung tanga tamangba yimsü dangi meyipba lisopurtemi pei tera mamatsüla aser sobaliba maitsü balaka wazüka ayutsüla ta Chief Minister Pema Khandu-i ayongzüker.

"India ya secular linük ka lir. Ni Buddhist nung ka lir, ni molungba tamangba yimsü mashii ka agizüka amangtsü ka dak temeten lir. Shingaiia ni menokdangtetsü saka ni teti Monpa nung dang asütsü" ta CM Khandu-i ashi.

Monpa ya Arunachal Pradesh nung tongti kin ka lir.

Model Village headquarters nung Nyishi Baptist Church Council (NBCC) indang Golden Jubilee sentong nung o jembidang Khandu-i iba tayongzüka agütsü.

"Arunachal Pradesh nung lisopurtem indang sobaliba maitsü balaka aliba ajaki meteta lir. Iba maitsü balaka ya mesamadaksütsüla" ta pai ashi.

Paisa Nyishi Christian temi sobaliba metoktsüba atema tenüingsang agütsü.

"Nai Nyishi mejembitetra, kodaser na Nyishi nung ta ashitsü? Alima nung lisopur sobaliba aika samaa aoba ama masütsü atema Khristan lennirtemi Nyishi sobaliba wazüka ayutsü atema lenmangtem aser maparen bushitsü mepishir" ta CM Khandu-isa metetdaksü.

"Ni nenok ajak nüksir. Nenoki sobaliba sobutsü agir angudang nenoki sobaliba metoktsüba ni ajiteter" ta Khandu-isa shisem.

Nyishi Baptist Church Council (NBCC)-i yi ajemba aser temeseba mozü achiba anema inyaksü alizüingtem ayuba ya kanga dang mapa tajung aser mapang shitak ka nung inyaker, ta paisa metetdaksü.

"Ozü sorkari mozü achiba anema inyaker saka sorkar kijai iba rara nung takok mengutetsü. NBCC-i iba tangzüka agiba pelashishia agizüker. Asenok külemi yi ajemba aser temeseba mozü achiba agientetsü" ta Arunachal CM-isa ashi.

NBCC-isa election mapang

sen amshitsü inyakyim anema raratsü nangzüka atema Khandu-i "tetenzük nungi ni sen amshiba inyakyim magizüker" ta ashi.

"2019 election magidang ni community-based organizations (CBOs) aser tamangba reju ajak dang sen yong vote agütsüba inyakyim anema noktaksü mepishia liasü. Tamangba yimsü rejutemi pei nütsüingtem angatetdaksütsü kanga tasak lir. Anungji ni maneni tamangba yimsü rejutem dang election nung sen amshiba sobaliba agientsü atema osang prokshitsü ayongzüker" ta CM Khandu-isa metetdaksü.

NBCC-i differently-abled atema rehabilitation centre aser convention centre ka yanglutsü atema Khandu-i lung azüingtsü aser akokba tashi pai iba mapa nung yariteptsü nangzüker.

Iba sentong nung Itanagar MLA Techi Kaso, Doimukh MLA Tana Hali Tara, Itanagar Municipal Corporation mayor Tame Phassang aser o jembir Rev Dr J M Ngulkhan Pau nungertem aden.

Kohima nung Kitsubozou Ward No. 5-i 'colony temerüktiba' naroküm angur



KMC Administrator Lanusenla Longkumer-i 11 buba Annual Inter-ward Cleanliness Competition nung takok angur den külemi agiba noksa angur. (Kohima, December 18)

Kohima, December 18, 2021 (TYO): Kohima Municipal Council (KMC)-i 11 buba Annual Inter-ward Cleanliness Competition ayongzüka agidang Kitsubozou colony (Ward No. 5) ajanga mezüngbuba jenjang takok angur.

Iba tetoktepba nung Merhülietsa (Ward No. 18) ajanga tanabuba aser Old Minister's Hill (Ward No. 14) ajanga tasembuba jenjang takok nguogo.

Mezüngbuba jenjang angur nem Rs 50000, tanabuba nem Rs 30000 aser tasembuba nem

Rs 20000 den kulikakettem agütsü.

Honibarnü Kohima Municipal Council Office nung KMC-i küm piyong Inter-ward & Shops cleanliness competition award sentong agia liasü.

Cleanest Shop Award 2021 nung K. V. Store, Sepfüzou (Ward No. 1) ajanga mezüngbuba jenjang angur aser parnok nem kulikaket den küm ka one-year Trade License Fee exemption agütsü.

Tanabuba jenjang nung M/s Japfü Store, Main Town (Ward No. 7) aser tasembuba

jenjang nung Mukesh Grocery, Main Town (Ward No. 6) ajanga takok angur.

Sentong nung KMC Administrator T. Lanusenla Longkumer-i tesentepertem pelaa agizükdang küm piyong tetoktepba ya benjung mapang decorations aser tobur jungdaksüba dang masü saka colony, ward aser dokan kiburtemi mapa inyakba nung ajemdaker agir ta ashi.

Sentong nung mendenji KMC assistant chief inspector Neilhouphrelie Paphino liasü aser Khanchulo Kath-i temoatsü meshia sarasadem.

EAC, Chumukedima-i Service Provider tem nem tetuyuba agütsü

Dimapur, Luchii/December 18 (TYO): Extra Assistant Commissioner, Chumukedima-i sangdong ka ajanga, November 8 nü National Highway 29 nung cable mesangshia alibatem yanglushitsü mesera agintsü atema Telecom Service Provider ajak nem tetuyuba agütsür aliba dak sendakba

nung, mapa minyakjemi alibatem inyaksü atema anogo 45 apuloktsüba metetdaksüogo.

Service Provider temi office dang application aser shiti balala ajanga maparentem ajak atakzükja aliba anogotem tsüngda tembanga inyaksü tenangzükba agütsüba sülen

iba teletmetba agiogo.

Ajisüaka Service Provider tem dang maparen ajak Indian Telegraph Right of Way Rules, 2016 kübok inyakyimtem dak ajemdaker aser PWD (NH) aser Power Department den angatetteper ang maparentem ajak inyaksü tetuyuba agütsüogo, ta kasa sangdong ajanga metetdaksü.

Deputy CM Patton-i About Us kensep sayatsü



Kohima, December 18, 2021 (TYO): Nagaland Deputy Chief Minister Yanthungo Patton-i Honibarnü "About Us" indang kensep ka sayatsüogo.

Iba kensep nung ken 8 lir aser itemji "Open your Heart," "Rise," "Loaded Love," "Rock on top," "Lead my heart," "Our Fairyland," "Gimme Gimme" aser "Right Now" lir.

"About Us" telok ya 2019 küm tentet aser iba telok nung Sochan Kikon (Vocal), Renlamo Ezung (Guitars), Poon Kikon (Guitars), Soren Kikon (Bass), Renbomo Yanthan (Keyboard) aser Lichithung Kithan (Drums) lir.

"Kentenbaren ya asenok taküm nung tongtipang shilem ka lir aser taküm nung kentenbaren melira tazüngla ta jembir. Kenten ajanga tangashirtem dang masü saka tatener aser tatemer temolung süneptsür" ta Y Patton-i ashi.

Nisung ajaki kentener mekümteter saka iba sempet alirtem aser meranga inyakertemi dang kentener tajung ka akümer. Iba ya Tsüngrem nungi sempet balaka moatsüba lir, ta paisa metetdaksü.

"Music ya industry ka kümogo aser mapa mangurtem asoshi sen arulen ka lir. Lanurtemi bendanga agüja

shilem agira kentenbaren nung tajangzük tulu lir. Chief minister Neiphui Rio lenisüba kübok sorkari Nagaland nung Task Force for Music & Arts (TaFMA) ajanga music ajungketsü mapa inyaker," ta Y Patton-isa ashi.

TaFMA indang alizüngji music ya industry ka kümdaktsü aser lanur aika mapa ngudaktsü atema lir, ta paisa shisem.

Iba sentong nung mendenji Yanpvuo Kikon liasü, Band Manager K. Edward Ngullie-i tesentepertem pelaa agizük aser TaFMA advisor Theja Meru-ia o jembi.

DDCF-i Nagaland sorkar nem tenüngsang agütsür

Dimapur, December 18, 2021 (TYO): Nagaland sorkari state nung district tasen asem kümtetba atema tenüngsang agütsür, ta Dimapur District Citizens' Forum (DDCF)-i metetdaksü.

State sorkari Nagaland nung 13 buba district Tseminyu, 14 buba district Niuland aser 15 buba district Chumoukedima ta kümtetogo.

District tasen kümtetsü shisateta teletmetba agiba

ajanga nübortem ajangzüksü aser terenlok bener arutsü, ta DDCF-i ashi.

Nagaland sorkar aser district tasen asem nung alirtem nem tenüngsang agütsür. Talisa, Nagaland sorkari

Chumoukedima ya 15 buba District ta osang sangoktsüba atema pelar ta DDCF President Yibemo Kikon aser General Secretary Richard

Haolai nati sangdong ka nung ashi.

FALT ketdangpur tasen shimogo



Dimapur, December 18, 2021 (TYO): December 18, 2021 nü Foothill Ao Youth Organization (AREA: NAGA UNITED - NIULAND, K U H U B O T O - SEITHEKEMA) indang 2 buba lokti senden menogo.

Iba senden ya senyur kidang (Naga United) amen aser Advisor, FALT Kazukaba-i temoatsü meshia sarasademertenzük.

Senden nung FALT Tir Tuden Jamir-i tesenteper ajak dang pelaba metetdaksü aser küm asem tashi Tsüngremi len anir aruba atema pelaba ashi.

Tuden Jamir-isa ketdangpur tasentem nem tenüngsang agütsü aser Naga nung atema maneni inyaksü ayongzük.

Iba senden nung Dimapur Ao Lanur Telongjem (DALT) Tir Tia Longchar-ia FALT dang maneni Aor aser Naga nung atema inyaksü ayongzük.

2022-2024 kümsük atema ketdangpurtem

1. President- Mr. Achen Imchen
2. Vice President- Mr. Imsuinba
3. General secretary- Mr. Tiameren
4. Assistant general secretary- Mr. Pangermeren
5. Finance secretary- Mr. Tajungyanger
6. Assistant finance secretary- Mr. Bendangnokdang
7. Press & Information secretary- Mr. Yachet Mollier

NLA session atema traffic tetuyuba agütsür

Dimapur, December 18, 2021 (TYO): December 20, 2021 nü 13 buba Nagaland Legislative Assembly (NLA) senden amentsü aliba atema traffic tetuyuba kar agütsüogo.

Assembly Secretariat telungi tsünglanglen agüja aliba 'car passes' alir dang aiddaktsü, ta PRO Kohima Police-i metetdaksü.

'X' (Black letter with Green background) - For Legislators
'Y' (White letter with Blue background) - For AHOds/HoDs

'Assembly Logo' (Red Background)-For Assembly Staff

'LH' (Blue letter with Yellow Background) - For Police Personnel and P.S/P.A

'O' (Black letter with White Background) - For IPR/Media and Other Department

'ON ASSEMBLY DUTY' (White letter with Blue background) - For Staff Bus/Pool & Dak Vehicles

Maneni, tsünglanglen agüja

aliba lenmangtem nung anepdang 6:00 ako nungi lenmang tezülen garitem anentsü memelatsü, ta paisa ashi.

BSNL Telephone Exchange nungi Classic Island.

Raj Bhavan nungi M.S Classic Island.

Classic Island nungi Assembly Secretariat via High School.

New CM Official Residence, Phezoucha nungi Assembly Secretariat.

Anepdang 6:00 ako nungi Assembly Session agiba mapang gari tulutem Kohima jila nung senzütsü memelar.

Kohima jila nung loading aser unloading ajunga anepdang 6:00 ako tashi nung tembangtsüla aser 'D' Block road nung gari tulutem anentsü memelar, ta PRO-isa metetdaksü.

Item tetuyuba sülen public-i anidaktsü imlar aser tashi mangartem indang gari police-i atsür aotsü aser iba senji gari kiburi menoktsü, ta PRO Kohima Police-isa metetdaksüogo.

NEPA nung officer 46 pass out süogo



North Eastern Police Academy (NEPA) nungi police officer 46 tenangzükba agidang tangokba noksa nung angur.

Shillong, Luchii/December 18 (Agencies): North Eastern Police Academy (NEPA) nungi police officer 46 graduate süogo. 49buba Batch Basic Course trainees, Dikshant Parade (Passing out Parade) sentong Umsaw Village, Ri-Bhoi District, Meghalaya kübok Academy Campus parade ground nung December 18 nü agia liasü.

49buba Basic Course indang training sentong ya 2021 küm January 4 nü tenzük. Training agirtem rongnung Tripura, Sikkim aser Nagaland nungi tetsür officer 2 aser tebur 44 densema liasü. Training agirtem ya kanga junga bushisüngdang aliba basic training agia liasü. Basic training inyakyim dak ajemdaker trainee tem ya kilong nung Police Science, Legal Studies aser Social Science subject tem nung training agütsü aser kima Drill, Weapons Training, Physical Efficiency, Police Operations aser Tactics amala training tem agütsüogo. Iba dak alia parnok nem kor sanger senzütsü, First Aid aser gari anitsüba training dena agüja liasü. Jungle Camp

module tatsüka ayongzük, kong parnoki Cordon & Search Operations, Ambush & Counter Ambush, Raid, Seizure amala inyakyim angazüka liasü. Maneni parnok nem policing aser tanga tongibang onüktem dak sendakba nung guest faculty tem den sensak asemtsü maongka agütsüogo.

Basic training takok ngua agiba dang masü saka 49th Basic Course trainees temi Sardar Patel University of Police, Security and Criminal Justice, Jodhpur nungi "Police Administration and Investigation" Post Graduate Diploma agizükogo.

Lenla ajak nung terenlok asoshi trainees tem Extempore & Debate club, Quiz Club, Photography Club, Sports Club, Social Service Club, Literary Club aser IT Club amala nung shilem agütsü ajungshio.

Ministry of Home affairs, Government of India kübok North Eastern Police Academy ya linük nung Academy rongnung balaka. Idaki North East State tem nungi aser linük nung tesem balala nungi police tem nem training agütsür.

Department tekolak ama NEPA Director-i academy nung trainer aser staff noklang ana dak tema achaayanger. NEPA-i NE state tem nung State police force inyayim liromedemdaksüogo.

Basic course balala agütsüba dak alia NEPA-i India kübok tesem balala nungi officer tem nem imparts in-service training agütsür. 1987 küm amenokba sülen NEPA-i basic course 49 agütsüogo aser trainee 3878 pass süogo. Tang batch 50buba nung Assam nungi trainee 579 training tagidak lir. NEPA-isa, online aser offline ajanga In-service course aika agütsür.

December 18 nü trainee officer temi parade nung kanga junga shilem agiogo, koba NEPA, Director Deepak Kumar-i asadanga liasü. Maneni NEPA Pipe Band aser NEPA Horse Contingent-i iba parade kanga meraketdaksü. Parade sentong nung Director Deepak Kumar-isa, training agiba mapang lenla balala nung tangar dang nungi alakteta takok tajung nguteterem nem Trophy aser Medal tem agüja liasü.

Süpokrem agiba atema Assam police ketdangsür ka apu

Guwahati, Luchii/December 18 (Agencies): Süpokrem sen 5000 agiba atema Karimganj police-i, south Assam kübok Patharkandi police station nung sub-inspector ka puogo.

Police temi pua aliba ketdangsür ya Jitendra Singha ta jangjaogo. Sübokrem agiba

indang tatalokba video ya Social media nung prokshiba sülen pa apu.

Video nung Singha-i Patharkandi police station nung nisung ka dang nungi süpokrem meshiba nguogo.

"Social media nung video prokshiba dak ajemdaker ken o

bushisüngdangba sülen @karimganjpolice-i tanü süpokrem agiba atema Patharkandi Police station nung inyaker Sub Inspector Jitendra Singha puogo. Pa anema criminal case ka benokogo," ta Special Director General of Assam Police GP Singh-i tweet asü.

Congress-i party ajak senden agishitsü akhang

Shillong, Luchii/December 18 (Agencies): Inter-state arrtsü mangatettep ken o dak sendakba nung opposition Congress-i, Meghalaya Chief Minister Conrad K Sangma dang senden ayongshitsü khangogo.

Congress party-i ashiba agi, Assam-Meghalaya arrtsü nung mangatettep aliba bentettsü atema sensaksem mapang Meghalaya sorkari par party sentoka toktsür.

Congress Legislature Party (CLP) lenir Ampareen Lyngdoh-i, December 15 nü interstate arrtsü ken o sensak asemtsü atema MDA-i ayongba all-party senden nung onok jaokba indang tejangja ka mali.

"Bhavan nung staff kati danga iba tongtibang shiti magizük aser Government of Meghalaya, political department indang dak receipt ajanga shiti

ya December 15 nü senden tembanger ang angu ta sayur," ta lai ashi.

Lokti tentet ajak nungi ken o angadangsü atema ayongba iba tongtibang senden nung Congress MLA temi shilem magi, ta aitsüba dak sendakba nung telangzüba agütsüba mapang Lyngdoh-i iba olen lemsatapa liasü.

Langpih nunga senden amenba mapanga Regional Committee, INC züngsemtem mejaok ta shia lai, "tongtibang onüktem nung telemtetba agütsü atema senden amenba mapang INC sentoka toktsüba ya tang mezüngbuba masü," ta ashi.

Laisa, MLA aser 33-Rambrai Jyrngam MDC temi senden amenba sülen anogo ka lir ang senden nung shilem agütsü jaokba osang agizüka liasü, ta ashi.

Lyngdoh-i ashiba agi, arrtsü ken o sensaksemtsü atema

senden ayonga amenba nung Indian National Congress-i shilem magi ta ashiba ajanga state nung aliba nüburttem anisatsü, ta ashi.

"Sorkari anosa onok mejaokba jangjaa onok kanga aoksar. Onoki iba ken o nung telemtetba ka magi tsüngda takaratiba nung onoka densema senden agishitsü akhang," ta lai ashi.

Maneni CLP lenir-i, Chief Minister dang December 15 nü agiba senden indang minutes lepareprangshia iba senden nung Meghalaya, Indian National Congress party mejaok anungji parnok iba tongtibang senden nung shilem magit, ta bendenlokjang, ta ashi.

Meghalaya-Assam arrtsü nung mangatettep aliba ken o dak sendakba nung Congress party tebilemba tejangja lir, koba küm 50 shi bangdaka lir, ta Lyngdoh-i ashi.

Assam State Cabinet-i tongtibang telemtetbatem agi

Guwahati, Luchii/December 18 (Agencies): Assam cabinet-i, Panchayat, Rural development aser sorkari achaayangba school tem nung nübu shimtsü temelaba agütsüogo. Iba osang ya Assam Chief Minister-i metetdakja liasü.

Chief Minister-i, department ajak nung third aser fourth-grade post tem atema nübu shimtsü asoshi State-level Recruitment Board ka tentettsü, ta ashi.

Cabinet-isa, sorkari teti atema mapa tazüng alibatem asoshi tesayurtem meshim tsüngda temsüa aliba nübutem 'guest teachers' ama inyaksü atema shimtsü telemtetba agiogo. Sorkari item tesayurtem nem ita shia itasen 10,000 agütsütsü. School committee

temi mapa nungi anener alirtem densema temsüa aliba local tem tesayur mapa inyaksü atema shimtsü. Tesayur ka ita ka dak tema leave agütsüa kümra inyaksangshi nung tetsükdaksü madoktsü atema item tesayurtem ya shimtsü akok.

Kasa mapang nung, local tem tejangraba dak ajemdaker sorkari yimtsüng, jila aser kiyong balala tenüng melentsütsü.

Cabinet-isa, state Assembly Session Session nung State Police Accountability Commission Act aser Assam Cattle Preservation Act nung temelenshi bener arutsü telemtetba agiogo.

Parnokisa, Cooperative department indang junior inspector aser auditor tem indang service rules agizükogo.

Manipur nung telungpur asem apu



Imphal, Luchii/December 18 (Agencies): Manipur police aser Assam Rifles na longjemer Mongolbar aser Bresthostibarnü, Bishnupur aser Imphal West districts meita aoba mapang telungpur telok ana nungi züngsem asem puogo, ta AR sangdong ka ajanga metetdaksü.

Parnok asem rongnung ana KCP (N) züngsem ket nung hand grenade ka bena lia Prepak (Pro) telok nungi lir, ta

kasa sangdong ajanga metetdaksü.

Osang tejangja angazükba sülen Assam Rifles Khoupum, Loktak aser Mantripukhri battalion aser police na longjemer meita aoba mapang telungpur asem ya pua liasü.

Bishnupur shishilembadak KCP (N) züngsem ket nung hand grenade ka bena lia ngutetogo, ta AR-isa ashi.

DEBTS RECOVERY TRIBUNAL, GUWAHATI
 Government of India, Ministry of Finance
 Department of Financial Services (Banking Division)
 Suwarna Bhawan, House No. 12, New Town Path,
 G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)
 (See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

RC/ No. 133 / 2021
Bank of Baroda -Vs- M/s. K.S. Tep & Electrical & Ors.

To,
 1. **Messers K.S. Tep & Electrical,**
 House No. 143, Ward No. 6, Tseminyu New Town, Kohima, NAGALAND- 797109.
 2. **Mrs. Tesinle Tep,**
 Wife of K. Sohilo Tep, Resident of House No. 143, Ward No. 6, Tseminyu New Town, Kohima, NAGALAND- 797109.

This is to certify that a sum of **Rs. 27,13,196.76 (Rupees Twenty Seven Lakhs Thirteen Thousand One Hundred Ninety Six and Paise Seventy Six only)** as per details given below has become due from you consequent to a Recovery Certificate issued by the Ld. Presiding Officer by an order dated 18-03-2021 in case No. 47/2020.

(1) Amount due as per the Recovery Certificate:	Rs. 21,34,397.00
(2) Interest from 04.09.2019 to 20.10.2021 @ 11% P.A.	Rs. 4,99,799.76
(3) Costs	Rs. 79,000.00
TOTAL	Rs. 27,13,196.76

2. You are hereby directed to pay the above sum within 15 days from the Publication of this notice, failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

3. In additions to the sums aforesaid, you will be also liable for
 (a) such interest as is payable in accordance with the recovery certificate RC/ No. 133 / 2021 for the period commencing immediately after issue of recovery certificate to the date of realization, and
 (b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 1ST DAY OF DECEMBER, 2021.
(S. KUMAR)
RECOVERY OFFICER



TIR YIMYIM YIMOBILEM (EDITORIAL)

DIMAPUR AMUNGNÜ, LUCHII (DECEMBER) 19, 2021

Tsüngrem temeim lir

Tanur asü dang onok rongnung aiben telangzüba mengui o toktepa jembitepbaji, ajak Tsüngremi yanglu süra Tsüngrem ya shibai yanglu (?) ta asüba tasüngdangba ya liasü. Aser kodang tain aküm, Tsüngrem yabo Tsüngremi yanglubatem kechisarina amato teka agi amdangtsü aser tenük agi angutsüba oset ka masü saka Tsüngrem yabo temeim lir ta angatet. Temeim yabo asenok tenük agi mangur aser tangshitsüa makok saka temeim ajanga nisungtem rongnung mapa inyakbabo asenoki angur. Terepranger mali timtema alitsüba ka ser nung temeim agi anepalur, samar alitsüba ser nung temeimer aliba agi kümzüker, balar alitsüba ser nung temeim aliba agi tajungba küma litetter, sentsüh agi tsübanger tepuokdak alitsüba ka ser nung temeim aliba agi sentsüh mali kümer nümadangdanga alir. Aji oda, asenoki temeimbo mangur saka temeim agi kija kibong aser lokti tajungba kümdakja tepela aser tesünep nung lidaktsüabajibo angur. Süra, temeim ya o dangbo masü, ibai ain tulu aketba taküm ka lir. Iba temeimji Tsüngrem ta asenoki Laishiba nung 1 Yohan 4 nung shia angur. Tanü asenoki Christmas anogo amongba ya iba temeimji alimai aruba bilemteta amonger. Iba Tsüngrem temeimji nisungtemi agizüktetsü atema shi kümer Yisu Khrista alimai yok. Iba nükjidongji angatetsü atema Laishiba nungsa Yohan 3:16 nung ashir, "Tsüngremi alima oda meim nung (kanga meim nung ta ashitsüa akok), Pai pei ajaso chir agütsü, anungji shirisa Pa dak amangdir mesamatsü, saka teti taküm angutsü." Tanü asenok alima nung alidang yabo, kenü asen taküm lendong nungi kümzüksüa akok saka iba jagi asen temang ya alima nungi kodanga mesamatsü ta masü saka mapang tongerbo samatsübasa. Ajisüaka, Laishiba nung ashiba Tsüngrem temeim agi kümzükbaba yabo, panüji atema dang masü saka teti atema, kodanga mesamai taküm alitsü ta shia lir. Kenü asoshi kümzükbajia tuluka nung, asenok taküm aser tanüla kodanga mesamatsüsa kümzükbaji temeim tulu lir aser iba temeimji Tsüngrem lir. Iba jagi asenok dang, 'Ni' nenok dang koma meim, yamaji nenok o nenok na ta meimtepang," ta Yohan 15:12 nung Yisui ashiba asenoki angur. Iba yabo temepishiba o ka masü saka ozüng agütsüba o ka lir, anungji kechisüdirsüaka angatsüla. Aji oda, tanü asenoki Christmas amongba nükjidong ya, iba temeimji Tsüngrem o asenok na tsüngda dang masü saka asenok o asenok na tsüngda akangshitsü asoshi amonger. Tanü asenok aikati Tsüngrem tenzüksü asoshi theology azüngtsüla aser arogo nung inyaksüla ta bilemer. Ano, karibo theology-a mazüngyonga arogo tenzükbaba mapa kar nung danga lira, aji agi Tsüngrem tenzüker amai bilemer. Ano, kari arogo nunga metenzükyonga tenla agütsüra, iba jagi Tsüngrem tenzüker amai bilemer. Ajisüaka, asenok dak temeim melira koda? Temeim mali ser theology azüngbaji Tsüngrem maden asen kijai Tsüngremer shisatsü bushitsü meranger asütsü? Temeim mali ser arogo nung tenzükbaba agi, theology azüngba agi inyaker dang ashi, pei arogo nung dang meima khuret mabentsü? Aji oda, pei asoshia pei mapa agi pei temulung masü tezüdanga inyaksüabaji temeim mali ser Tsüngremer wadang aser nübertem tenzükbaba mapa nung inyaksüabaji asütsü. Temeim maliba takümji Yisu Khrista pei taküm nung kibur mekümdaktsüba takümtem asütsü, kechiyong Yisui temeim lir. Iba jagi 1 Korint 13 nung tenyar Paul-i ashir, asenok dak tenem ajungdoktsüsa tamang liaka, shin o jembiteptsüsa ain sempet liaka, temeim melira item tamang aser ain tashi ajakji amajok, kechiyong temeim mali ser amangba tamangji tiyazü aser temeim mali ser oshi nung shi o jembibatemeim amajok, kechiyong temeim maliba tetezüji asenok Tsüngrem den mali ser tema nung anemsü agi amangertem lir. Asenok dak Khrista lir saka tangar dang memeimteteter tabo mesütetsü, kechiyong Khristaji temeim, anungji asenok dak temeim alitsüla. Asenoki aiben, ni'bo merangyonga pa dang mesüra la dangbo memeimteteter ta jembir, ibaji asenok dak Yisu Khrista jungjunga monga maliba tamaittsü lir. Tsüngrem temeim yabo temeimtsüka asüba agi meimba temeim masü saka tesempatsüka saka mesamadaktsünüba agi angati meimba temeim lir. Iba Tsüngrem temeimji asenok dak lira, meima bilemba agi asenok kidang mena melitet, tanüla nung atsüngzüka oa alirtem ajungshitsü aser samaa aliba tanülatem kümzüksü asoshi ayamesotsü. Aji oda, Tsüngremi mulungba inyaksü asoshi nungdabajibo tazüngba degree masü, rongsen tenla tulu agütsüba agia masü, arogo nung shilem agiba agia masü saka asenok dak temeim alitsüla, kechiyong Tsüngrem temeim lir. Iba temeimji kodang asenok dak lidir, asenoki tangar-a meimtettsü aser iba jagi dang tangaria asenok Yisu dak amanger Khristan-a ta metettsü (Yohan 13:35).

OLEMSABANG

Mayimjem Atepzüng Wadang

Imliodang Aier

(Yashi adok nungi...)

2.1.1. Iba mapa ya Arogo karibo takok ngua inyakdar, saka meinyakteti alir Arogotemia inyaksü lenang lir. Pei Arogo telungtet nung aliba tzümartem den Khrista kulisüba mapa inyaksü atema Arogoi full-time evangelist/pastor ka par oshi jembitetter kokra par nisung ayutsüla. Aser parnok asoshi Nagamese/Hindi fellowship tentetja Tsüngrem külemtsü maongka agütsütsü merangtsüla. Iba amaji inyaka meilong meilongi asenoki item nübur den Tsüngrem mapa tulu inyaktsttsü. Tanela aika anir arutettsü.

2.1.2. Arogoi social, political, cultural aspect ajakbo ayimjema meinyaktettsü, anungji NGOs tem den long term partnership nung item nüburtem nungdak aser timtem repranga anepalutsüla. Talisa school aser day care centre migrants tanurtem atema lapok nung asenoki parnok aika tongteta yaritettsü.

2.1.3. Arogoi food and health ministry nunga temulung agütsütsü nungdaker. Nisung ka asoshi chiyongtsü aser anema aliba ya kanga tongtipang. Anungji, Tsüngrem O-sa meshiaka item mapa tajung ajanga parnok Yisu temeimji asenok dak angutsü.

2.1.4. Arogoi seminar aser workshop ayonga aser pulpit nungi aener koma anepalutsü sayutsüla. Kechiyong aener anepaluba nung Arogo kisung shilem masü, saka kija shia shilem lir ta angatetdaktsütsüla.

Item mapa ishika ya danga Arogoi temulung agüja inyaktet nungbo asen limai arua mapa inyaker tzümar aika Khristan tajung küma asenoki yaritettsü. Parnok kodang par limai meyipba odir asensa muotetaka parnok par nisung den Yisu kuli asütsü. Ibaji Arogoi kulisüba mapa nung shilem tajung agitetba tatishitsü asütsü.

2.2. Asen lanur den kulisüba

Kodang kulisüba ta südir, yangi Tsüngrem O ashiba kisung tsütsü masü saka nisung ka shi taküm jenjang tajungba kümdaktsütsü inyakba tsütsüa rangloker angatetner. Tejaklen ashiba ama tang asen tendak nung Arogo nütsüng lanur aika mapa mali shirüba kazüteper. Süra iba yagi Arogoa kangshir masü no? Asadanga ajanga sayuba agi tang asen lima nung sen teimba indoka inyakba mapaji construction mapa ya ka lir. Arogo nunga iba mapa nungsa sen teimba indoker. Arogotem tanen makai construction project balala inyakteper. Saka iba mapa nung inyaktertemji reprangra asen nisung masü saka tzümar teimba, koba tetezü asen Arogo sen teimba ka tzümar keti aor. Külen reprangra asen nisung mapa maka kazüteper. Mapa makara chiyongtsü makatsü, chiyongtsü makara aoyatsü/rakzükraktemtsü, tanela samatsü. Ibai Arogo khuretsa asütsü. Anungji, iba timtem nungi asen nütsüng kümzüksü mechi Arogotemi joko item mapa ya inyaknung koda?

2.2.1. Arogo mapa nung tzümar dang masü asen nisung amshitsü. Asen nisung tzümar dang nungi tajungba inyakteter aika lir. Construction mapa den, tenla ki aser Arogo ki-tem nung sound system, electrification mapa amala asen nisung nem agütsütsüla.

2.2.2. Asen chiri mapa tajungtiba nung inyaktettsü asoshi Arogoi achayanga lanurtem nem skill development training balala agütsütsüla. Kodang parnok mapatem junga angazükdir junga inyakyettsü, joko tsümaru tajungba inyakteter ta asüba majembitsü.

2.2.3. Arogoi mapa makar lanurtem asoshi Arogo mapa nung amshiba kisung masü saka pei akokba mapa inyaksü ajungshitsü (kibok aser pulpit nungi). Kokra Arogoi budget nung inoka lanurtem mapa tenzüksü sen terara lemsaa agüja tenzükdaktsü nung parnok jenjang ajungketdang Arogoa ajungkettsü (e.g. küm nung nisung pongu nem 20-50k loan/subsidy agüja mapa tenzükdaktsütsü). Parnoki aazükba ajanga parnok kibong nokdaktettsü Arogo nunga züngsem tajung küma Arogo yaritettsü aser arogoa rongsen renloktsü.

2.2.4. Arogoi pei nisung mapa balala nung amshitsü arendaka bilembaji, local taah (charge) teimba, kibur ashi manger, kazüba mapang teimba, mapang shidak nung mapa nung mamdaker a.a. Item timtem nungi jenbuttsü atema Arogoi parnok den mapang balala nung sensaksem sentongtem agia angajemtep nunga ajungtsü. Aser mapa inyaktertemia kibur atema bilema kibur makoksatsüsa inyakra ajak atema tajangzük asütsü.

Local nisungi contract mapa tulua agizüka inyaktettsü asoshi Arogoi leman kar government den sayuteptsü koda? Tatishitsü agi Nagaland Contract Labour Act nung kechi mapa südir süaka asen local nisung kabo dena partnership nung dang contract mapa ajak inyaksü melatsüla. Iba ama mesükba telatet agi asen nisung maongka aika angutsü asü ta bilemer.

Otem

Tanü Ao Arogotemi mission mapa tulu kanga jeta inyaka odar talisa bendang missiontem. Saka tali awaa oa inyakdang asen atepzüng nung teinyaksü kar meinyakjemra ajia Tsüngrem tsüngdang asen sentsühsa asütsü. Kasa sentsüh sa rongnunga asen atep züngdang tanela manepaluba sentsüh ya tuluba südisü ta bilemer. Anungji, joko Arogotem khen asen atepzüngi meyipba asen telongtet merüktettsü mapang tongja tongogoni ta YSS tenung nung ayimoktsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Archaeologist temi Galilee nung ano synagogue ka nguogo



Israel kübok Migdal nung Yisu Khrista aser Mary Magdalene nung mapang aliba synagogue ka ngutetba tesem nung archaeologist tem tangokba noksa nung angur.

December 18, 2021: Israel nung archaeologist temi Yisu Khrista aser Mary Magdalene nung mapang nung aliba synagogue ka ngutetogo aser ibaji Laishiba nung shia aliba Mary Magdalene asoba tesem-Galilee kübok Magdala nung ngutet.

Tangbo Magdala dang Migdal ta ajar. Archaeologist temi ashiba agi, parnoki Yirusalem nung tanabuba tekülem ki aliba mapang nung aliba tanabuba synagogue ka ngutetogo aser ibaji 515 mesüra 516 B.C nung 70 A.D tashi liasü ta bilemer.

"Iba yimdak Rome nung mapang nung aliba synagogue tanabuba ngutetogo; iba mapang nung Yirusalem yimti nung tekülem ki liasü," ta Israel Antiquities Authority (IAA)-i

Facebook ajanga metetdaksü. University of Haifa, Zinman Institute of Archaeology tongti, Prof. Adi Erlich aser University of Haifa nung Excavation co-director, Dina Avshalom-Gorni nati akhidang iba mapang nung Galilee nung Yihuda nung loktiliba aser tamangba jenjang indang lemsatap.

Tenatisa, akhidang Yihuda nungeri Torah azünga den ibaji shisadangtsü aser lokti adenshitsu atema kiojen ka nüngdaka liasü, ta metetdaksü.

Migdal nung mezüngbuba synagogue ji 2009 küm nguteta liasü, aser synagogue ngutetba yimdakjisa tzü chigoba, lenmang, shishilembaba tesem ka aser industrial facilities angu.

Tanabuba synagogue ya mezüng Israel Antiquities Authority nung Barak Tzin-i

nguteta liasü aser iba synagogue ji mezüngbuba synagogue nung metre 200 shi dang pilar lir.

IAA-i sangdong ka ajanga, tang tanabuba synagogue ngutetba ya ajanga par mapang nung Yihuda nung libaliro bushiteta aliba melenshitsu akümer, ta metetdaksü.

Osangbener den jembidang Excavation co-director, Avshalom Gorni-i, "Onoki Mary Magdalene aser lar kibong den Migdal nung alirtem yimsü dak sendakba sentongtem nung adentsü atema yangi aliba synagogue-i aruba yimdangi arua angur," ta metetdaksü.

Migdal jila nung kiojen tasen yanglutsü atema sentong lia iba tesem nung synagogue tanabuba ngutetogo. Tanabuba synagogue ya IAA, Y.G. Contractual aser University of Haifa nung excavation team-i angu.

Avshalom Gorni-isa, mezüngbuba synagogue indang atemji noksa keta yangluba liasü aser tanabuba synagogue indang atemji lisem agi menokba atem liasü, ta metetdaksü.

Mezüng anguba synagogue ji industrial area ka nung liasü saka tawa anguba synagogue jibo yimti lenmang nung liasü, ta Avshalom-isa metetdaksü.

Times of Israel osang ajanga ashiba agi, tanabuba synagogue nungji tongti takdang tulu ka aser tiplen takdang tilala ana liasü. Synagogue nungjisa long agi chitetba menden talang ka liasü.

Mozambique nung Jihadist kiralongrartemi Pastor ka tekolak tangzük

December 18, 2021: December 15, 2021 nü Mozambique kübok Cabo Delgado nung Islamic kiralongrartemi pastor ka tekolak tangzüka tepset aser pa kinüngtsü nem tekolakji bendaktsür police station-i yok, ta International Christian Concern (ICC)-i metetdaksü.

Pastor kinüngtsüi police dang, Islamic State den tesendaktep aliba kiralongrartemi alu ka nung pastor soit aser pa tekolak tangzüka lepsetba sülen la nem

tekolakji agütsü, aser tekolakji bener oa ketdangsertem nem iba osang metetdakjang, ta tuyua liasü.

Tesüiba küm pezü tsünga Mozambique nung telungpurtem aser kiralongrartemi nisung 3,000 dak tema tepsetogo aser nisung 100,000 jungnüa jenshiogo.

Kiralongrar telok Al-Shabab ya Islamic State den tesendaktep lir aser parnoki pastor tepset asütsüa akok, ta melung melemi bilemer.

Taküm March ita nunga Al-

Shabab teloki Cabo Delgado nung nisung aika tepseta liasü. Iba tesem nung mapang shia kiralongrartemi Khristantem puer aoer mesüra tepseter.

"Tsüngremi pastor kinüngtsü nem tesünep agüjang ta sarasademjang. Mozambique nung yimjung atema sarasademjang aser Arogo reshikangshirtem atema sarasademja parnoki Khrista temeim meteta akümtsü atema sarasademjang," ta ICC-i mepishia metetdaksü.

ANO GO ABEN TSÜNGREM DEN

TETSÜBU MASÜ TASHI

Kechiyong Tsüngremi asenok nem tetsübu masü, saka ain aser temeim aser tazüokba tanela agütsü. 2 Tim 1:7

Nisung tsübu bilembaji Tsüngrem nung masü. Tanü teblemetsü tulu ka alibaji tamanger aikati Tsüngrem dang nung nisung ang tetsübuba, aser ibaji ajanga Tsüngrem peladaktsütsü asoshi tenokdangba arudaktsür, kechiyong amajok nung nisung peldaktsütsü asoshi merangteper.

Asangur Timoti pa yimya nung pa sasa pa dak temulung melemtetba aser shimang nunga tashi mait taküm liasü. Ibayongji pa taküm nung nisungi kechi ashir mesüra koma bilemetsü ta nisung tsübuba agi sünga liasü. Anungji tenyar Pauli nisung tsübu bilembaji Tsüngrem nung masü ta ajang-ajanga jemb. Hau, asen jakdang kechi lir aji asenoki memetet aser iba jagi asenok tsübu bilemdaktsür. Saka Tsüngremi koma angur yamaji ngudaktsütsü asoshi Tanela Temeshi ain tashi asenok nem agütsü. Anungji Tanela Temeshi asenok den ali tashi kecha nunga tsübu alitsü tenügdaktsü maka. Tetsübu yongrak nung salatsütsü Yisu Khrista aru. Anungji ne taküm nung tetsübu kechisa ali item nung jagi sala-a ain aser temeim aser tazüokba tanela nung tashi anga alitsü asoshi Tsüngrem dang meshiang.

SARASADEM:

Kibuba Ain aser temeim aser tazüokba tanela nung alitsü kü nem agüjangma. Amen

Karnataka state nung maneni Khristantem anema inyaker

December 18, 2021: sorkari pa transfer sütsüogo. Karnataka nung BJP sorkari Ajisüaka osangbener den anti-converion ozüng tasen ka jembidang Chitradurga benoktsü atema renemba Deputy Commissioner, mapang nung state nung Kavitha S. Mannikeri-ibo, maneni Khristantem anema "Inyakyim shidak benshiogo. inyakdar, ta International Pa office nung küm ana Christian Concern (ICC)-i tenzüka aruogo, anungji pai metetdaksü. report ka agütsüba aser pa

Tesüiba ita ishika BJP transfer yokba naji lenirtemi anti-conversion sendaktepa mali," ta ozüng ka benoktsü atema metetdaksü. jembia arudar.

December ita tetenzüklen jembidang anti conversion Hosaduga nung Tehsildar, Y. ozüng pusema Karnataka Thippeswamy-i report ka nung Home Affairs Minister, ajanga, Chitradurga district Araga Jnanendra-i, linük nung kübok Hosaduga nung yimsü meyipdaktsüba kangshia Khristan yimsü dangi menokdangtetra India nung meyipdaktsür ta asüba osangji sobaliba samatsü, ta jembia tai ta metetdaksü. liasü.

Anti-conversion ozüng Karnataka nung anti benoktsü teblembe nung state conversion ozüng benoktsü nung BJP lenirtem aikati, atema jemb tenzüka sülen Khristantem Hindu nungertem state nung Khristantem anema kangshia mesüra mesüzüka inyakba kanga bulua kümogo Khristan yimsü dangi aser tesem kar nungbo meyipdaktsür, ta tai tonglokja Khristantem Khristmas arudar. Thippeswamy-i iba tekülem sentong-a thinentüsü report metetdaksüba sülen kümogo.



December 4 aser 5 anogo Oting aser Mon nung meyimlaba lentong tulu ajurua asen Naga nung aser talisa Konyak lokti rangben temulung shiranga mepelatetba asoshi kangasa nemjema bilemer. Iba temulung raksaba nung asen ABAM-ia tamang sarasadem nung yaritepba temaitsü December 17, 2021 anogo Konyak union semdanga sarasadem tenla Rs. 100000 (Rupees one Lakh only) agüja sarasadem tajung agir aru. Tsüngremi joko yamala lendong ajak nung asen Naga nung ajak kümzüka ayutsü aser Konyak Union nem tesüneptsüba aser tarutsü nung temoatsü agüjangma ta ABAM tamañ sarasadem ayur.

OLONG PAITEP # 6031

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPIEN		LANGTSÜNGLEN	
1. Yakob tetsü	- (6)	2. _ _ _ gki	- (3)
4. Mezüng nisung	- (4)	3. Telungpur telok ka	- (2)
6. Tasen lai kakat ka	- (5)	5. Tsüngremi mezüng paktetdaksüba	- (5)
9. Au lanu	- (2)	7. Tia	- (4)
12. Tejen lai 21 buba	- (11)	8. Yakob-er jabaso ka	- (5)
15. Tekolak tembar	- (2)	10. Abraham tebutü	- (4)
16. Zütsüra anepsang	- (5)	11. Rebeka kinungpu	- (4)
17. Kain tenu	- (4)	13. Esau tenu	- (5)
18. Hana-er jabaso	- (6)	14. Tzünglu tilala aru	- (4)
		16. Jafet tebu	- (3)
		17. Teka agi kongshi	- (2)

OLONG PAITEP # 6030 TELANGZÜBA

TIPIEN :		LANGTSÜNGLEN :	
2. Pongsen, 5. Lepko, 7. Omen,		1. Alimang, 2. Pongen, 3. Samaru,	
8. Maongka, 10. Yangkhu,		4. Nün, 6. Pio, 9. Nüngdak, 10. Yongya,	
12. Senpong, 14. Angu, 15. Raksa,		11. Kongro, 13. Ora, 14. Ata.	
16. Arameso,			

KOMA SÜLA TELANGZÜBA

Q. Nagaland nung India sepaitem ya melidaktsü nunga koma süla ?

Nagaland nung Indian army mayutsüji lenmang ka dang lir, Naga nung Independent angutsüla. Ibaji mangu tashi parnok alitsübaso.

- WhatsApp

Nagaland nung India sepaitemji mali majungtsü, tang tashi nungbo parnokji alitsübaso.

- SMS

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

TANÜBO NAI LANGZÜANG

Q. Küm shia koba State/UT nung 'Nupi Lal Day' amunger?

[A] Assam [B] Manipur

[C] Arunachal Pradesh [D] Sikkim

===== (Taruba adok nung onoki langzüsü)

YASHI ADOK TELANGZÜBA : USA

AO OSHI ANGAZÜKDAK:


TANÜ ANGAZÜKTSÜBA OJANG



Lokmedem
(n) nüngdak atema nisung kar shimteta akümba menden (board)
* Arogo sentong yanglutsü atema **lokmedem** ka shim.

Loknu
(n) luden tilaba ka (sub-committee)
* Jubilee amongtsü atema **loknu** balala tenet shim.

NAI-A YA METETTER MA



Charles Dickens-i züluba kakat - "A Christmas Carol" ya 1843 küm December 19 nü adok. Charles Dickens-i züluba kakat title ya 'A Christmas Carol in Prose, Being a Ghost-Story of Christmas' lir aser Christmas matongdang, December 24, 1843 tashi nung iba kakat indang copy 6000 shi yokadok.

SUDOKU # 6071 TELANGZUBA # 6070

9	1		4	7	3	4	8	7	3	6	5	1	9	2				
5	7			3						9	2	5	4	7	1	8	3	6
2			6	7	1	5	8			6	3	1	9	2	8	7	4	5
			9	3						7	6	4	1	3	2	5	8	9
3	6		4	5	8	2				3	9	2	8	5	7	4	6	1
4	5	2				3	8			1	5	8	6	9	4	3	2	7
		5							4	5	4	9	7	8	6	2	1	3
	4	1		2	6		3			8	7	3	2	1	9	6	5	4
			8	1	4	6	2	5		2	1	6	5	4	3	9	7	8

OJANG LUTEP # 5617

NÜKE :

ONYGI :

GBDANO :

ENASI :

INÜAGBA :

ERAS :

LEMBBIA :

AKAJ :

INTETTYAKSÜ :

AKMOK :

OJANG LUTEP TELANGZÜBA # 5616

MASHI DANG YONGI PEI TEINYAKTSÜ MAPA BALALA METETTA INYAKADOK TAJUNGBA

TAN HOPTA ATEMA - KOMA SÜLA ?

Q. Nagaland government nung tatar yimsüsürtem ya Naga National Workers o India Government na tsüngda o tongdar aser teyariteper dang masü saka Naga yimten tebilemtsü ken o tembangtsü atema, India den tongti shilem agia Naga yimten ken o süoka jembir aküm nunga koma süla ?

Kibong Kümer Küm 40 Ajungba (Mr. Rongsen Jamir & Mrs. R. Asangla Walling) (19th Dec. 1981 - 19th Dec. 2021)



Temeim Ala aser Apa, tanü nena temeshi kibong kümer küm 40 tashi Tsüngremi arishi moatsüba asoshi Tsüngrem tenüng asanger. Nena ajemalu aser tamang sarasadem ajanga onok chirnur 4 aser semchir 2 teti temoatsü nung alir. Nena sarasadem aser sayutsüngi onoki mamar. Tsüngremi arishi talang moajang ta onok sarasadem.

~ Teti Temeim Chirnurtem aser Semchirtem.

J&K temeden atema lanurtemi ola adoktsüla: Mehbooba Mufti

Jammu, December 18 (Agencies): Honibarnü PDP tongti lenir, Mehbooba Mufti-i lanurtem dang, Centre sorkari asen temeden ajak rakzüko, anungji item temeden tanaben meyipa angutsü atema lanurtemi ola adoktsüla, saka long aser prangpong mamshitsüla, ta metetdaksü.

Taoba mapang chief minister, Mehbooba Mufti-isa, kiralongrartemi civilian tepsettsü ta intelligence osang ajanga BJP-i aniba sorkar nem metetdaksür liasü, saka parnoki metetsümonga kecha meinyak, ta aitsü.

Arrotsülen aliba Rajouri

district nung lanurtem den jembidang lai, "Nenoki iba tensa angatetsüla aser ola adoktsüla. Tanü nenoki tasütait tanela mesayura tarutsü putui asen lima nung tasüngdangba akatsü, kechiyong asen li, mapa aser ali nungi adokba rongsen ajak tangar keti aoer. Asenoki asen temeden atema nokdaksüla," ta ayongzük.

Mehbooba-isa, "Ni nenok dang long mesüra prangpong amshiang, ta kodanga mashitsü. Iba lenmang nung jartem atema parnok ket nung injang renema lir ta ni meteta lir. Nenoki ola adoktsüla aser asen temeden atema

democratic inyakyim ajanga raraba nung onok den külemi shilem agitsüla," ta ayongzük.

Tawa Kashmir nung civilian aika tepsetba dak sendakba nung lai, intelligence ajanga sorkar nem item osang jelia metetdaksür liasü, saka sorkari kecha meinyak, ta aitsü.

"Asürtemji asen nüburtem lir, saka Kashmiri lanurtem ang 900 apu. Taoba ita home minister-i Jammu & Kashmir semdangba mapang nunga lanur 1000 puogo. Asen jail tem sünga nisung puoka lir, ibayongji tangbo pua alirtemji Agra jail-i anir aoer," ta laisa shisem.

WHO-i India nung yangluba Covovax vaccine amshitsü melaogo

New Delhi, December 18 (Agencies): India nung vaccine manufacturing sector jenjang ano tajungba küma Hokolbarnü World Health Organisation (WHO)-i emergency use atema coronavirus vaccine- Covovax amshitsü temelaba agütsüogo.

Covovax vaccine ya Serum Institute of India (SII)-i yanglur.

Tang tashi India nung drug regulator DCGI-ibo Covovax amshitsü atema temelaba magütsü.

SII-isa AstraZenaca den senteper Covishield vaccine yangludat.

Covovax vaccine densema tang tashi nung WHO-i emergency use atema coronavirus vaccine 9 amshitsü temelaba agüja lir.

WHO-i tetetba Technical Advisory Group for Emergency Use Listing (TAG-EUL) aser alima tesem balala nungi

mongintemi Covovax vaccine ya coronavirus anema WHO standards kübok temsüa lir ta lemetetogo, ta WHO-i metetdaksü.

US nung amenoka aliba Novavax, Inc aser SII-i külem sangdong ka ajanga, SARS-CoV-2 ajanga adokdaksüba coronavirus tashidak nokdangtsü atema iba vaccine ya arrshi küm 18 aser temapurtem nem agütsütsü melaogo, ta metetdaksü.

Serum Institute of India (SII) CEO, Adar Poonawalla-i, WHO-i iba vaccine amshitsü temelaba agütsüba India nung scientist tem, doctor tem aser sensotemi pelaa agizüker, ta metetdaksü.

Tan ita tetenzüklen SII CEO, Adar Poonawalla-isa, taruba ita trok tsüngda tanurtem atema Covovax tenzüksü atema SII tebilemba lir; iba vaccine ajanga arrshi küm asem tanurtem tashi kümzüksü, ta metetdaksü.



December 18, 2021 nü Amethi nung 'Manhgai Hatao, BJP Bhagao Pratigya Padyatara' lokti senden nung Congress Party lenirtem- Rahul Gandhi aser Priyanka Gandhi Vadra nati lokti dak teka ayiploksüba noksa nung angur.

Goa election atema Congress-i Goa Forward Party den lokteper

New Delhi, December 18 (Agencies): Sangküm küm tetenzüklen Goa nung assembly election agitsü lia Congress party-i Goa Forward Party (GFP) den lokteptsü, ta sangdongogo.

Tamalen Goa nung BJP-i aniba sorkar nung GFP densema liasü saka 2019 küm July ita nung party Tir, Vijai Sardesai densema party MLA asempronglai BJP sorkar toktsü. Sardesai ya deputy chief minister inyaka liasü.

Honibarnü New Delhi nung osangbenertem senden ka nung jembidang Goa atema All India Congress Committee (AICC) in-charge, Dinesh Gundu Rao-i, Goa nung taruba assembly election atema Congress aser GFP na loktepogo, ta metetdaksü.

Rao-i, "(GFP Tir) Vijai Sardesai-i Delhi nung ozü lenir Rahul Gandhi ajuru aser pai Congress nungitsü lemsatapa liasü. Iba sülen pai Goa nung ochimashi BJP sorkar atsüngdoksü aser temelenshi bener arutsü atema onok den longjemer inyaker, ta lemsatapa liasü. Ajioda onoki pai benokbaji pelaa agizükogo," ta metetdaksü.

Iba sülen Goa nung party ana

tsüngda senden aika menogo ta shia Rao-i, "Onoki party ana tsüngda tebilemsü onük balala aika lemsatepogo aser lenmang tasen nung ajemoktsü yongyaa atar," ta metetdaksü.

"Tesüiba mapang kechisa atalokogo, itemji tesülen toktsür. Yimtenren nungbo tembar ayimtsü aser teloktep yanglutsü atema lenmang lir. Onok kati ka dak tamang akar aser melung alemer," ta Congress lenirisa metetdaksü.

"Onoki longjemer election nung tokteptsü aser iba teloktep ajanga ano nisung aikati Congress nung adentsü, ta ni imlar. Taruba election nung nüburtemi BJP sendoktsü atema telemetba agiogo ta ni amanger, kechiyong nüburtemi state nung tashitait sorkar ka aginer," ta pai ashi.

Rao-isa, mapang tetemsü nung party ana tsüngda menden lemsatsü, ta metetdaksü.

2017 küm Goa Assembly election sülen sorkar akümtsü atema GFP-i BJP yaria liasü. Iba sülen Manohar Parrikar leniba nung sorkar aküm saka 2019 küm Parrikar süadokba sülenbo GFP aser BJP teloktep mejungi aküm aser tesüsa Sardesai-i aniba party-i BJP toktsü.

PM Modi-i Shahjahanpur nung Ganga e-way project tenzüksüogo



December 18, 2021 nü Shahjahanpur nung kilometer 594 talang Ganga Expressway Porject tenzüksüba sentong nung Ato kilonser, Narendra Modi, Uttar Pradesh Chief Minister, Yogi Adityanath aser Deputy Chief Minister, Keshav Prasad Maurya nung den BJP lenirtem tangokba noksa nung angur.

New Delhi, Luchii/ December 18 (Agencies): Honibarnü Ato kilonser, Narendra Modi-i Uttar Pradesh kübok Shahjahanpur nung kilometer 594 talang Ganga Expressway yanglutsü atema project tenzükja foundation long azüngtsüogo.

Iba project ajanga Uttar Pradesh tesem ajaklen lenmangtem sendaktepba den külemi rongsenkettsüng tsütsü kanga renoktsü.

Iba project tenzükba sentong nung Uttar Pradesh chief minister, Yogi Adityanath aser deputy chief minister Keshav Prasad Maurya nata densema liasü.

Tesülen Modi-i twitter ajanga, "Iba ya kanga tongtibang project ka lir, koba ajanga Uttar Pradesh kübok

tesem aika sendakteptsü. Iba ya ajanga rongsenkettsüng aser tourism tsütsü terenlok alitsü," ta metetdaksü.

Iba sentong nung jembidang Modi-i, "Tanü UP nung expressway tulutiba- Ganga Expressway tenzük. Ni UP nungertem nem tenüngsang agütsür," ta metetdaksü.

"Iba expressway yangluba ajanga mapa aika adoktsü aser lanur meyirjang aikati maangka tasen angutsü," ta Ato kilonserisa metetdaksü.

"UP nung expressways network, airports tasen yangluba aser train lenmang tasen yangluba ajanga tanemtanemi Uttar Pradesh nung alirtem atema temoatsü bener arutsütsü," ta pai ashi.

UP nung Chief Minister, Yogi-i medical colleges aika

lapoktsüogo aser direct transfer scheme ajanga aluyimertem aika tajangzük nguogo, ta pai ashi.

"Tamalenbo ozüng junga mebenokba ajanga nisung aikati Uttar Pradesh toktsür ao. Tesüiba küm pezü ser tesadng tsüngda bulldozers amshia ozüng alema yangluba kiojen aika raksatsüogo," ta pai metetdaksü.

Kilometer 594 talang six-lane Ganga Expressway ya sen crore 36,200 indoka yanglutsü. Iba lenmang ya Meerut kübok Bijauli yim anasa nungi tenzüksü aser Prayagraj kübok Judapur Dandu yim anasa tembangtsü. Iba lenmang ajanga Meerut, Hapur, Bulandshahr, Amroha, Sambhal, Budaun, Shahjahanpur, Hardoi, Unnao, Rae Bareli, Pratapgarh aser Prayagraj süitsü.

Typhoon Rai: Philippines nung asür 23 junogo



Typhoon Rai ajanga timtemertem kumzükba noksa nung angur.

Manila, Luchii/December 18 (Agencies): Philippines dak taküm tamajungtiba kongshiba yipru lendong nung asür 23 jungogo, ta disaster agency-i Honibarnü metetdaksüogo.

Typhoon Rai-i southern aser central tesemtem dak kongshiba sülen nisung 300,000 dak tema pei ki aser tzüküm nung aliba resort tem toktsür jenshia ao. Iba yipru ajanga tesem aika nung communications aser electricity dak kongshio.

Rai yipru yagi Brehostibarnü Siargao asetkong dak kongshiba mapang super typhoon ka liasü aser mopung 195 kilometres per hour nung ona liasü.

Iba sülen mopung süia aoba mapang speed tajemba kuma 150 kph aküm. Yipur mopung

tesashi ajanga ki kilem apongtochtsüba den süngtong tera dena raktetsü aser yimti yimtung ajak jana agi sünga aküm.

Yipru agi kanga mejungi kongshir aliba tesemtem nung military, police, coast guard aser fire personnel 18,000 dak tema tekümzükba maparen nung densentsü, ta national disaster agency otongdar Mark Timbal-i AFP dang ashi.

"Surigao aser Siargao nung yipur ajanga teraksatsüba tulu bener arutsüogo," ta Timbal-i ashi.

Siargao aser iba tesem anasa aliba Surigao yimti nung Communications tang tashi mejungi lir.

Philippine Coast Guard-i

social media ajanga Surigao nung ki teraksa aser palm süngtongtem anüka shisar aliba lemsatepogo.

Anüing nungi tangokba noksa nung tsük lutem tzü agi mobanger aliba nguogo.

Dinagat Vice Governor Nilo Demerey-i, ABS-CBN dang ashiba agi iba tesem nung nisung trok süogo.

Disaster agency-ia, nisung tenet samara bushiba aser nisung ana yiruba indang osang agütsüogo.

"Yipur kanga tesashi liasü. Nüburtemi pei ki yanglushitsü merangtepdar, kechiyong onok indang evacuation centre tema raksaogo. Parnok tejenok dak maka.. ajak raksaogo," ta Demerey-i ashi.

Taliban sorkari Kabul nung Afghan passports agütsü tenzükogo

Kabul, Luchii/December 18 (Agencies): Afghanistan nung Taliban ketdangsürtemi Honibarnü ashiba agi, parnoki kabul nung passport agütsü tenzüksü. Iba ajanga Taliba yimsüsüba kübok kumzükba mali ta bilembapurtem atema timla agütsüogo.

Afghanistan nung rongsenketzüng chirepba aser humanitarian tebilemtsü tulu adoker aliba nungi jenbotsü atema Afghan nung meyrejang aikati passport atema apply süogo.

Ketangsertemi Honibarnü nü nungi tenzükba Kabul indang passport office nung passport agütsütsü, ta passport department tekolakba Alam Gul Haqqani-i osangbenertem dang ashi.

August 15 nü sorkar atsüingba sülen Afghan nung aiki linük toktsür aotsü aritepba mapang Taliban-i passport agütsü anenatok.

October ita ketdangsürtemi Kabul indang passport office lapoktsü saka anogo nung applications meyrejang aika process asüba ajanga biometric equipment raksatok aser maparen minyakteti aküm.

"Technical tsütsü tetsükdaktsütem ajak bentetogo," ta Haqqani-i ashiba den, office inyaksangshi manen tsüingda passport atema apply sür alirtem nem mezüng agütsütsü ta ashi.

Applications tasentem January 10 nü nungi agizük tenzüksü, ta paisa metetdaksü.

Passport agütsüba ya Taliban-i alima kintem dang temsüa alirtem nem tenokdangba kecha magütsü linük toktsür odaktsütsü ta nangzükba tetendangba ka ama züngshir.

Taliba-i sorkar atsüingba sülen linük aser lokti tentet balalai teyari agüja aliba ajak sotatok aser iba ajanga linük rongsenketzüng jenjang kanga mejungi kumogo aser UN-i ashiba agi nüburtem aika yakta ayawara agi meneptsü.

Taliban-i sorkar kümteter joko ita ishika arur saka linüktemi tang tashi parnok magizüki lir aser tenangzükbatem ataloktsüba sülenang parnok agizüksü ta shia arudar.



Karachi kübok Shershah tesem nung Honibarnü kilentsü nung gas balala atsüingdenba sülen pokteta adok asütsü ta temulung melemi bilemba lendong ka nung nisung 10 pokset aser aika yiruogo, ta ketdangsürtemi metetdaksü.

Nepal-i quarantine tetuyuba agütsü

Kathmandu, Luchii/December 18 (Agencies): Coronavirus Omicron variant agi alima ajunga amokmerenba mapang Nepal-i Honibarnü, linük 67 nungi arurtem hopta ana quarantine asütsü tetuyuba agütsüogo. Linüktem ya timba Europe aser Africa nungi lir.

"Shisema aliba linüktem nungi arurtem dang pei anenzükba hotel nung peisasa taa agütsür anogo 7 quarantine asütsü mepeshir. Hotel nung anogo tenet quarantine asüba sülen RT-PCR ajanga Covid-19 tashidak keta mali ta putetra ano anogo tenet kidang quarantine asütsü mepeshir. Tashidak keta aliba potetertem isolation center mesera mozükitemi yoktsü," ta Nepal Ministry of Home Affairs sangdong ka ajanga metetdaksü.

"Covid-19 (Omicron) kanga kara prokshia aoba temulungdang yur Nepal Council of Ministers-i

November 29 nü Nepal-i arurtem atema tetuyuba kar agütsütsü telemteba agia liasü," ta kasa sangdong nung shia lir.

Iba tetuyuba küboki aitba linüktem rongnung Germany, Italy, United Kingdom, Canada aser United States nung densema lir.

Covid-19 variant tasen ka poktetba indang osang ya South Africa-i November 25 nü World Health Organisation (WHO) nem metetdaksü. WHO sangdong ka ajanga ashiba agi, mezüngbuba B.1.1.529 potetba ya taküm November 9 nü bendenba sample nungi poteta liasü.

November 26 nü WHO-i Covid-19 variant tasenba B.1.1.529, koba mezüng South Africa nung poteta liasü iba variant nem ya 'Omicron ta nüngja agütsü. WHO-i Omicron variant ya kanga dang lendong keta aliba variant ka ta metetdaksüogo.



Erbil December 18: December 17 nü tzümetsüng aruba sülen Iraq kübok Erbil tesem nung alirtemi jana merketetba noksa nung angur. Hokolbarnü tzümetsüng lendong nung nisung 11 süogo.

South Africa-i Africa linüktem nem vaccine 2m agütsütsü

Cape Town, Luchii/December 18 (Agencies): South Africa sorkari tanga Africa linüktem nem Johnson & Johnson indang COVID-19 vaccine dose million ana tenla agütsütsü ta sangdongogo.

USD million 18 alang vaccine ya Gqeberha nung Aspen Pharmacare manufacturing facility nung yanglutsü aser taruba kum Africa linük balala nem agütsütsü, ta kasa sangdong ajanga Hokolbarnü metetdaksü.

"COVID-19 tashidak menatepa aoba nokdanga lokti aser rongsenketzüng kumzükba ayutsüba lenmang ajak agi Africa nungertem nem vaccine agütsütsüba ya lir," ta tir Ramaphosa-i ashi.

Arishi kum 69 tain tir dak December 12 nü COVID-19 tashidak potet aser pa Cape Town nung lokti nungi pilar South African military health service-i temang anepaludar.

Hokolbarnüsa Ramaphosa indang office sangdong ka ajanga pa dak tashidak keta aliba temaitsü terara sayudar saka pa taneptsü ngudar, ta ashi.

African Union indang African Vaccine Acquisition Trust-i tenla agütsür aliba den South Africa-i agütsüba vaccine ya bendenlokra vaccine dose million 100 dak tema akümtsü. African vaccination group yagi continent nung linük balala nem agütsütsü atema vaccine dose million 500 dak tema alizükogo.

Africa ya alima nung vaccine ishitba agiba continent lir. World Health Organization (WHO)-i ashiba agi, 2024 kum tesadang tashi nunga Africa nung nütsünyongsük billion 1.3 aliba nungi shilem 70 nem vaccine magütsüjemi alitsü.

Africa linük 54 nungi 20 nung dang nütsüngtongsük shilem 10 tashi nem vaccine agütsür lir. Africa linüktem nung nütsünyongsük shilem ana dak tajemba nem vaccine dose anaprongla agütsür lir, ta WHO-i ashi.

South Africa nung the Omicron variant poktetba sülen tang tashidak aziüktsü atema timtemtepa arudar aser tang tashidak menartem ya shilem 78 bo Omicron variant menar aliba potetogo, ta Health Minister Joe Phaahla-i ashi.

TVS Ntorq 125 SuperSquad Edition tasen ana sayaogo



New Delhi, Luchii/December 18, 2021 (Agencies):

TVS Ntorq 125 SuperSquad Edition sabang kübok TVS Motor Company-i Marvel indang Spider-Man aser Thor ajanga ajungmesoba scooter tasen ana sayaogo.

Taoba küm Marvel Super Heroe - Iron Man, Black Panther aser Captain America edition sayaa liasü aser company-i iba SuperSquad Edition nung character tasen ana bendenlokogo.

TVS Ntorq 125 indang SuperSquad edition atema, TVS Company-i Disney India indang consumer products den

longjemer inyaker. TVS Ntorq 125 ya India indang mezüing Bluetooth connected scooter den RT-Fi technology aketba two wheeler ka asütsü.

Senior Vice President (Marketing) - Commuters, Corporate Brand & Dealer Transformation, TVS Motor Company, Aniruddha Haldar-i, "Marvel Super Heroes - Spider-Man aser Thor ajanga ajungmesoba edition tasen ana bendenloka aser sayatsü maongka anguba atema pelar.

Marvel character rongnung Spiderman aser Thor kanga nungtugu lir aser India nung character anaprongla sapur

timba küma aoba asadanteta onoki iba edition nung character tasen ana bendenloktsü lemtet. Edition tasen ana bendenlokba ajanga tawa tanü lanurtemi TVS Ntorq 125 kanga sapua amshitsü imlar," ta ashi.

Marvel Spider-Man aser Thor version anaprongla nung character den apet design balala inoka yangluogo. Iba SuperSquad Edition indang TVS Connect App ya SmartXconnect* ajanga tashi agütsür. Iba app lapokba mapang, pei tata character indang 'silhouette' talisa Spider-Man logo aser Thor indang 'hammer' (Mjolnir) sayur.

TVS Ntorq 125 SuperSquad Edition jenjang sen 84,850 (ex-showroom, Delhi) asütsü. 2018 küm TVS Ntorq 125 ya India indang mezüing Bluetooth-connected scooter ka ama saya liasü. Iba mapang nungi, TVS Ntorq 125 nung design tasen, racing-inspired performance aser technology balala bendenlokja arudar.

Bluetooth connectivity den bendenloksema, iba scooter nung Voice Assist function aser dual ride modes - Race aser Street inoka yangluogo.

Kibong Kümer Küm 25 Ajunger (Mr. Tinumayang Jamir & Mrs. Purkumla Lkr) (19th Dec.1996 - 19th Dec. 2021)



Temeim Oja & Oba,

Nena kibong kümer küm 25 tashi arudang Tsüngremer sayatenya teka agi moaja iba tashi len ania aruba ngua süngmanger aser kanga pelar. Ajaki nükshiaka kibong aikati iba jenjang ya majangzükteter, saka nena dakbo Tsüngremer balaka saklokogo. Ano maneni ozü tsürabur küm 50 buba alizüing benjong jagi apusodang Tsüngremer taochi teka agi len aniang ta arishi meshia sarasademtsür.

~ Temeim Chirnurtem

"Temeim aketba tebu ka pilaogo, mapa meranga inyaker ka anisüngzüker, nai iba akhümlü toktsür orr onok temulung raksar, saka Tsüngremer tajungtiba dang agir."



Onoki teti meimba asür **K. CEMPONG AO** (Mangmetong), shiba December 11, 2021 anogo adianu aser temeimer temi mekütbanger tesünep nung iba akhümlü toktsür orr onok mangyim jashi nung alidang, kwinakati ozü atema aria bilemja, temeim sayuba den mapa tajung agi nungitta yariogo, nenok ajak dang ozü pelaba metetdaksür.

~ Temeim Kinungtsü, Chirnurtem, Anük-Apangtem, Semchirtem aser Tanabuba Semchirtem.

Cate Blanchett nem '2022 César d'Honneur' agütsütsü



Cate Blanchett

London, Luchii/December 18, 2021 (Agencies): French Film Academy-i actress Cate Blanchett nem lifetime achievement award ka agütsütsü lemtet.

2022 César d'Honneur takok angur ka ama iba Academy ajanga arishi küm 52 tain actress, Cate Blanchett shimogo. Sangküm 47buba César ceremony sentong shilem ama February 25, 2022 (Hokolbarnü) Paris nung Cate-i iba award agizütsü.

Academy sangdong ka ajanga angazükba agi, "February 25, 2022 nü Olympia nung 47th Cesar Ceremony agiba mapang, alima ajungai

jangjaa aliba Australia tsür actress aser producer; anaben Oscar award takok angur, Cate Blanchett-i sabang nung César d'Honneur agizütsü."

Production company Dirty Films indang Co-founder aser director den külemi la den inyaker, Andrew Upton aser Coco Francini nungeri, Cate Blanchett ya sabang balala nung shilem agir artist nungtugu ka lir. Lai cinema, television aser theatre nung shilem balala agiba alimai jangjaa lir, ta lemsatop.

Actress ka ama wadang nung ajemoker külen nungi, Cate-i 1999 küm Shekhar Kapur indang Drama film Queen Elizabeth nung tongti

shilem agiba atema 'Golden Globe for Best Actress'; Martin Scorsese indang 'Aviator' nung Katharine Hepburn ama shilem agiba atema 2005 küm 'Oscar for Best Supporting Actor'; 2007 küm Venice Film Festival nung Volpi Cup; Woody Allen indang 'Blue Jasmine' nung shilem agiba atema 2014 küm 'Oscar for Best Actress' aser 2018 küm 'Stanley Kubrick Award for Excellence in Cinema' densema nomination aser award balala ngua lir.

Film balala nung Cate Blanchett-i shilem agidang, la sempet ajanga terepranger aika peladaksür. Peter Jackson indang 'Lord of the Rings' aser 'Hobbit' nung lai Elven Queen - Galadriel ama shilem agiogo. Ano, Taika Waititi indang 'Thor: Ragnarok' nung lai goddess Hela ama aser David Fincher indang 'The Curious Case of Benjamin Button' mesüra Todd Haynes' 'Carol' nung shilem agiba ajanga la tali jangjaa aküm.

Acting dak alaka, Cate Blanchett-i tetsür temeden maparen nung shilem tulu agia inyaker. Iba den külemi lai Goodwill Ambassador for UNHCR aser refugee atema United Nations agency nung bendanga agüja shilem tulu agiba atema 2018 küm Davos nung World Economic Forum sentong nung la nem Crystal Prize agütsü.

Rita Ora aser Sean Paul longjemer ken ka yanglu



Sean Paul

Rita Ora

Luchii/December 18, 2021

(Agencies): Reggae track ka atema Rita Ora-i Sean Paul den longjemer inyakogo. Arishi küm 31 tain pop kentener Rita-i dancehall star Sean den longjemer reggae ken ka yangluogo aser Sean-i, la ola tanganütsüka aser lai iba ken junga tenogo, ta lemsatop.

Sean-i, "Rita den külemi reggae ken ka yangluogo. Lai iba ama maparen (reggae music) kodanga meinyakdang aser taoba mapang nunga lai reggae ken atenba mangashidang. Iba ken nung la ola jangratemtsüka lir," ta ashi.

"Anogo tajung ka nung iba ken sayatsü mapang agi sempettsüra kanga ajungtsü ama bilemer. Kü indang kensep tasenba nung iba ken dena mali, ta saka iba ken bendenloktsü imlar.

Ni atema iba amala reggae ken ya kanga dang balaka aser nungtugu pop kentener, Rita shibai taoba mapang reggae ken tena mali, la den iba ken yanglutsü maongka anguba atema pelar. Lai ola tajung ajanga iba ken tali tepor jungdaksür," ta Sean-i lemsatop.

2018 küm 'Phoenix' kensep sayar külen nungi Rita-i kensep ka danga sayaa mali.

"Music yanglutsü asoshi tebilemba lir aser mapang talangka nungi maparen tenzütsü atema kü mulung nung tejbibiba ka liasü. Kensep tasen ka yanglua aser tour sentong nung shilem agitsü asoshi yongyar. Live sentong tem nung shilem aginür aser mapa rongnung ni live sentong kanga meimer," ta Rita-i ashi.

4buba Nagaland Strongman & CrossFit competition agiogo



Kohima, Luchii/December 18, 2021 (TYO):

Nagaland Strongman & Fitness Association (NSFA) akhüm nung Honibarnü Old NST tesem nung 4buba Nagaland Strongman (Men) aser CrossFit Competition (Men & Women) ayonga agiogo, ta sangdong ajanga metetdaksü.

Iba tetoktepba ya "Eat Smart Eat Safe," omen nung ajemdaker agi aser Tourism Department, Kohima Smart City Development Ltd, IDBI Bank den Directorate of Economics & Statistics, Nagaland ajanga nungitta liasü.

Strongman competition nung Sedevizo Keretsii-i takok ngua pai Nagaland nung 'strongest man' title ajanzüktet. Kasa tetoktepba nung Tsuknungakum Jamir, Mangoulun Haokip aser Kevidi Linyii AKA 'The Panda'

nungeri runners-up angu. Sedevizo nem senpet 30,000 den külemi champion's trophy - 'The Naga Hammer' agütsü. Runners up asem nem senpet 20,000, 10,000 aser 5000 agüja liasü.

Kasa anogo, Men's CrossFit Challenge nung Bisekhoto Gwirie-i 'Fittest Man' title akok aser pa nem senpet 30,000 agütsü. Iba tetoktepba nung runners-up Imliyanger Aier aser Zhopao Movi naprongla nem senpet 20,000 aser 10,000 agütsüogo.

Tetsür CrossFit Challenge nung Peiheiteile-i 'Fittest Woman' title angu aser la nem senpet 10,000 agütsü. Kasa tetoktepba nung runners-up Tsujen aser Manchen naprongla nem senpet 7000 aser 5000 agütsü.

Iba strongman asayamung nung shilem agirtemi 'truck pulling, deadlift, shoulder press, log lift, log race, farmers walk, tyre flip aser Naga stone nung toktepa liasü.

Maneni, Naga CrossFit Challenge asayamung nung, shilem agirtemi burpees, clean & jerk, chin up, log lift squats, dumbbell front rise, dead lift aser box jump nung toktepogo.

Iba sentong nung T. Lanusenla Longkumer, administrator, Kohima Municipal Council aser Neidilhou Angami, director, Economics & Statistics, Nagaland na dena liasü.

4buba Nagaland Strongman & CrossFit competition nung senpet (Prize money) atema 1st class contractor, K.C. Angami-i senotsü teyari agüja liasü, ta kasa sangdong nung shia lir.

Lucknow franchise-i team mentor ama Gautam Gambhir shimogo

New Delhi, Luchii/December 18, 2021 (Agencies): Indian Premier League (IPL) 2022 atema sentongtem renemshiba mapang ka nung, taoba mapang Kolkata Knight Riders captain Gautam Gambhir ya franchise tasen - Lucknow franchise indang team mentor ama shimogo, ta Honibarnü sangdong ajanga franchise kibur Sanjiv Goenka-i metetdaksü.

Gambhir-i captain ama KKR franchise tenung nungi asayaba mapang, pa akhüm nung Kolkata Knight Riders-i anaben tashi Indian Premier League koka lir aser iba League nung pa ya asayar takotet ka ama züingshir.

IPL nung asaya 154 nungi Gambhir-i half century 36 densema run 4217 (average 31.23) yanglua lir aser iba asayamung putiotsü nung batter tajungtiba rongnung pa jenjang 10buba nung lir.

2011 küm iba franchise nung captain ama adenba sülen, Gambhir teyari ajanga KKR nung temelenshi tulu adokdakja liasü aser pa akhüm nung Kolkata Knight Riders-i 2012 aser 2014 küm IPL title takok angu.

"Iba franchise maparen nung kü dak temulung lemteta

iba maongka tulu agütsüba atema Dr Goenka aser RPSG Group dang pelaba metetdaksür. Tetoktepba ka nung takok angutsü asoshi tanü tashi kü dak tejangraba tulu lir aser takoker ka ama shilem agütsü asoshi anogoshia kü mulungiang nung tejembiba ka aiter. Tama tazütsü ka atema dang ni meinyaktsü, saka Uttar Pradesh atema ni bendanga agütsür inyaktsü terenemba lir," ta Gambhir-i ashi.

Nüngja agüja maliba franchise kibur, Sanjiv Goenka-i RPSG nung Gambhir pelashishia agizükogo.

IPL 2022 atema, team indang head coach ama taoba mapang Zimbabwe captain Andy Flower aniokba osang Sanjiv Goenka-i sangdongba sülen, anogo ka lir Gambhir ya team mentor ama shimer asütsü.

2020 küm nungi Punjab Kings atema captain inyaksang KL Rahul-i team den külemi masayatsü lemtetba sülen, anogo ishika lir Flower mapa nungi anentsü asoshi Punjab Kings dang tezüluba ajanga metetdaksü.

KL Rahul-i Lucknow franchise nung adentsü aser iba den külemi team indang captain ama inyaktsü imlar.

ATK Mohun Bagan-i coach Habas mapa nungi anentsü



Antonio Lopez Habas (File photo)

Kolkata, Luchii/December 18, 2021 (Agencies): ATK Mohun Bagan-i head coach Antonio Lopez Habas mapa nungi anentsüogo. Honibarnü, Club sangdong ka ajanga angazükba agi, coach tasen ka meshim tashi assistant, Manuel Cascallana-i coach mapa bena atatsü.

"ATK Mohun Bagan atema ATKMB-i coach mapa nungi Antonio Habas anentsüogo," ta Club sangdong nung shia lir.

ISL nung takok tajung anguba coach, Habas atema tasüngdangba agütsütsü asoshi osangbener dang metetdaksüba sülen, pa mapa nungi agienba osang sangdonga liasü. Habas akhüm nung Mohun Bagan-i ISL

title anaben takok anguba den, final aser semi final khen khen tongteta lir.

Arishi küm 64 tain Habas, shiba ATK aser Mohun Bagan na longjemer külen nungi ATKMB-i agienba coach rongnung mezüng asütsü, pa akhüm nung Club-i Indian Super League anaben aser 2020 küm Mohun Bagan-i I-League anaben koka lir. ISL mezüng season nung Mumbai City FC-i takok angu aser Mohun Bagan-i runners up jenjang ajanzüktet.

Habas akhüm nung ATKMB puri tan season takok ngua asaya tenzü, kong Club-i atonga Kerala Blasters aser SC East Bengal madak takok angu.

Ajisüaka, tanüngba game pezü nung Club-i asaya ka danga takok mangu, kong Club-i 1-5 agi Mumbai City makok aser parnoki 1-2 agi Jamshedpur FC makok. Iba sülen club ana (Chennaiyin den 1-1 aser Bengaluru FC den 3-3) den draw nung tembanga liasü.

Item asaya tamakok anguba dak sendakba nung, Habas-i, "Item asaya makok ajanga club maitsü samaogo," ta ashi.

AFC Cup indang inter-zonal semi-final nung ATKMB-i 0-6 agi Nasaf FC makok sülen, Habas maparen nung aika mepelai liasü. Tan season ISL nung Habas-i Club nung bendanglen nungi asayar pezü dang anioka asayadaksü. 2014 küm Mohun Bagan-i ISL takok anguba mapang Habas-i bendanglen nungi asayar 6 aser 2019 küm Club-i tesüsa iba League title takok anguba mapang bendanglen nungi asayar 5 tashi anioka liasü.

Tang, Mohun Bagan nung coach tasen ka shimsü asoshi mapang agütsü akok, kechiyong Covid-19 dak sendakba nung senzusenbongtsü atema tenokdangba den ISL bio-buble telungi aittsü asoshi timtem asütsü akok.

December 21, 2021 nü ATKMB-i NorthEast United den asayatsü.

NBA-i Junior Boys Basketball team sangdongogo



Dimapur, Luchii/December 18, 2021 (TYO): Taruba Junior National Basketball Championship 2022 atema, Nagaland Basketball Association-i Hokolbarnü (17.12.2021) Junior Boys Basketball Team sangdongogo, ta sangdong ka ajanga Nagaland Basketball Association, Secretary, Zasivi Meyase-i metetdaksü.

Junior National Basketball Championship 2022 tetoktepba ya Basketball Federation of India akhüm nung Madhya Pradesh Basketball Association-i ayongzüktsü. Iba championship ya January 4 nungi 10, 2022 tsüngda Janjeerwala Chouraha, Race Course Road, Indore, Madhya Pradesh anasa

Basketball Complex nung asayatsü terenemba lir.

Nagaland head coach Chumbenthung Humtsoe aser team manager Rajan Nayak nati anir Nagaland Junior boys team-i iba asayamung nung shilem agütsü.

Junior National Basketball Championship 2022 atema Nagaland Junior boys squad nung Peteneihu Solo, Chenlanthung Ovung, Sedezhalie Suohu, Nourhevi Linyu, Sedeneituo Kuotsu, Thejaser, Keriekhoto Zao, Rensuthung L Odyuo, Peteneizo Kire, Wormathing Luikham, Mesale Yhoshu aser Sanenlong Lemtur dena lir, ta kasa sangdong ajanga metetdaksü.

BILEMDANGANG

"Mapa tajung inyaker sensamasatsübaji kangki laodaktsüba den saku."